



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

Tir Yimiyim

tiryimiyim@aolima

tir yimiyim

TAPAK 8



G-7 senden nung PM Modi-i wara anema longjemer raratsü ayongzük

Mask masemba atema Brazil tir dang senchi achi



VOL. XVIII NO. 240 (ADOK 240) DIMAPUR

TENTONÜ (MONDAY)

AAMI (JUNE) 14, 2021

₹ 5.00

Yimten latettsü atema lemnang lapokjang: K Therie

Dimapur, June 13, 2021 (TYO): Nagaland Governor aser Interlocutor-i yimten olemtep tembangogo ta shiogo anungji Nagaland State Assembly, JLF mesüra Core Committee nungdak mali. Külen, NSCN(IM)-ia Core Committee dang Frame Work Agreement nung teka maitsü shiogo ta NPCC President K Therie-i ashi.

November 17, 2017 nung WC of NNPGs-ia sorkar den Agreed Points nangzüktepogo aser sendaka alirtemi yimten latettsü atema takhangba agütsüogo. Ajisüaka, State sorkari September 2019 nungi mapang atsülanga arur anungji parnoki iba mapa anentsüla. DAN-I, II aser III sorkartemi küm 18 yimsü süa aruba ya ashioktsüba mapang ka dang lir, ta paisa metetdaksü.

Nagaland nung vote enoktsürtemi ashioktsür nem sorkar yimsü asütsü tashi agütsüba sülen yimdong nung ola

adokba aser India sorkar aitsür saka iba ya asenoki vote enoktsüba ajanga khuret ajuruba lir, ta paisa ashi.

"Nagaland nung Congress Party dak alaka tanga political party ajaki (Ruling aser Opposition) mapang atsülanga inyakyim nung shilem agir. Parnokisa Hindutva den tesentaktep yanglua lir aser parnoki Nagaland nung asoshi mebilemer saka tashi aser sen atema dang bilemer," ta K Therie-i metetdaksü.

Parnoki ajaki akhümtsüba aser agizükteba telemteba agütsü ta nangzükogo anungji parnok ya ashioktsürtem masü saka ochishirtem ta süra, Framework Agreement (3rd Aug 2015) aser Agreed Points (17th Nov 2017) kübok yimten latettsü atema Assembly loksatsüla aser India sorkar o olemteper nem maparen bendanga agütsütsüla. Yamaji süra, memenui yimten latettsü aser election agütsü, ta paisa ashi.

India aser Assam sorkartemi putiotsü meyipa repringshitsüla: UNTABA

Dimapur, June 13, 2021 (TYO): Centre aser Assam sorkartemi telungpur telok balala den tenangzüktep tajung agiba atema pelar saka putiotsü kulitem nung majemdaki telemteba agira majungtsü, ta United Naga Tribes Association on Border Areas (UNTABA)-i metetdaksüogo.

"Assam kübok Karbi Anglong aser Dima Hasao tesemtem nung mezüng alirtemji Rengma, Zeme aser Zeliangrong Naga nung lir anungji tesülen arurtem den yimten tenangzüktep agiba ajanga iba tesem nung kodanga yimjung aser tesünep malitsü" ta UNTABA-i ashi.

1830s nung British nungeri Naga Hills telungi ait aser 1837 nungi Naga yimtsüng dang tax sarutsü tenzük. Iba tesem nung Naga nung alir ta angazükba sülen British ketdangsurtemi parnok indang 1841 official gazette nung 'Rengma Naga Hills' ta jaloktsü. Iba sülen Naga tesemtem madak tajungba ketdangsurtsü atema Asaloo (tang Dima Hasao district kübok lir) nung Sub-divisional Headquarter ka amenok, ta parnokisa metetdaksü.

Iba sülen parnok yimsütsüba kübok Naga kin timba anioxtsü atema 1866 küm Samaguting (tang Chumukedima) nung Naga Hills District kümteta liasü. Maneni, tetsükdaksü majurutsü atema 1875 küm Naga Hills District atema arrtsü balaka latettsü, ta UNTABA-isa ashi.

Tanü Karbi Anglong Autonomous Territorial Council (KAATC) kübok Naga Hills District adenbatemji item ya lir. Nambor RF, Daigurung RF, Kaliani RF, Mikir RF, Diphu RF, Rengma RF, Daldali RF, Dhansiri RF, Langting Mupa RF aser Lumding RF. Item tesem ya Naga Hills District nungi Assam nung taoba Nowgong aser Sibsagar district tem nem agütsü.

"Anungji India sorkari putiotsü meyipa repringshitsü ayongzük. UNTABA-isa India sorkar dang North East Reorganization Act of 1971 meyipa repringshitsü atema mapa sentongtem atonga mapa inyaksü ayongzük," ta Chairman Hukavi T Yephuthomi aser General Secretary Imsumongba Pongen nati sangdong nung metetdaksü.

COVID-19 Nagaland: Anogo tibuba taneptsü angur timba

Kohima, June 13, 2021 (TYO): Nagaland nung anogo tibuba COVID-19 puteter dang nungibo taneptsü angur timba liasü. Deobarnü nisung 204 taneptsü angur aser 82 dak puteta nisung 23,644 kümogo. "Tanü nisung 82 dak COVID-19 aliba putet. Parnokji Kohima nung 30, Dimapur nung 28, Mokokchung nung 11, Zunheboto nung 5, Mon nung 4, Longleng nung 2 aser Kiphire o Phek nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i metetdaksü.

"Deobarnü COVID-19 puteta alir nisung 204 taneptsü angur. Parnokji Dimapur nung 137, Mokokchung nung 39, Kohima o Phek nung tenetnet (7), Peren nung 5, Wokha o

Kiphire nung pezüzü (4) aser Longleng nung 1 lir. Parnok züngsema taneptsü angur ajak agi 19,026 kümogo" ta paisa ashi.

Tang Nagaland nung nisung 3,502 anepaludar aser positive cases rate 14.81% aluogo, ta Dr Kikon-isa ashi.

Deobarnü COVID-19 puteta alir nisung 5 asü. Mokokchung nung asem aser Dimapur o Tuensang nung kaka asü. Parnok züngsema tasür ajak agi 453 kümogo saka parnok 14 bo tanga tashidak ajanga asü, ta paisa metetdaksü.

Nagaland nung COVID-19 puteta nisung 663 tashi tanga state temi ogo.

Tang tashi nung Nagaland nung COVID-19 alitsü akok ta temolung meleme bilemba sample 2,07,480 tendangogo.

RT-PCR ajanga 93,713, TrueNat ajanga 58,483 aser Rapid Antigen Test ajanga 55,284 tendang, ta Dr Kikon-isa ashi.

"Hokolbar tashi nung nisung 2,84,341 nem COVID-19 vaccine indang dose 3,39,033 agütsüogo" ta State Immunization Officer, Dr Ritu Thurr-ia ashi.

Vaccine agirtemji frontline workers 59,411, healthcare workers 15,697, arishi küm 45 ser temapur 1,29,477 aser arishi küm 18 o 44 tsüngda alir 79,756 lir.

"Vaccine agirtem rongnung nisung 54,692-i dose anaprong agiogo. Parnokji frontline workers 28,123, healthcare workers 10,302 aser arishi küm 45 ser temapur 16,267 lir," ta Dr Thurr-isa metetdaksü.

MTLT-i COVID-19 agi shirangertem atema Helpline lapoktsür

Dimapur, June 13, 2021 (TYO): Mokokchung nung nisung aika dak COVID-19 puteta aser ano COVID agi shirangertem, parnok kibongtem aser healthcare worker temi timtem ajuruba nung yariteptsü atema Mokokchung Town Lanur Telongjem (MTLT)-i 'Helpline' ka lapokogo.

"Mokokchung nung kin mesüra tamangba yimsü telemsa kecha melii COVID-19 agi shirangertem yaritsü atema iba Helpline tenzük," ta MTLT President, Aolong Imchen aser Grievances Cell Convener, Imkummeren Jamir nati sangdong ka nung ashi.

"Tesüiba hopta ishika Mokokchung nung COVID-19 kanga puteta aser nisung asüba atema aoksar. Iba virus asenok dangi arutsübaji meteta dang liasü aser iba wara anema raratsü asoshi Mokokchung nung

healthcare infrastructure renema liasü ta bilema liasü. Kechiyong 2020 küm total lockdown asü dang iba wara anema renemtsü mapang peria dang nguogo saka asen loktiliba nung virus ajanga timtem tulu agütsüba angudang temolung shiranger" ta MTLT-i metetdaksü.

MTLT-i IMDH, Mokokchung semdanga MS Dr. Limatula Aier den sensaksemogo. IMDH nung MS dena doctor 24, nurse 67, lab technicians kar, attendants, security guards, ambulance drivers aser teyariteper ajak nem tenüngsang agütsü.

IMDH nung doctor, nurse aser technician aika COVID-19 menar timtemba ajanga nübo agi meperir ta osang angazük. Anungji iba ama tensa ka nung sorkari Mokokchung COVID-19 tensa asadanger teyari

agütsütsü mepishir, ta MTLT-i ashi.

Tanga 'COVID-19 District Task Force' nung mapa lemsüka aliba IMDH doctor tem pei mapa lemsükdaki yoktsüla aser lab technicians kar shimba den TrueNat machine talila agütsütsü atema sorkar ayongzük, ta MTLT-isa metetdaksüogo.

"Mokokchung nung senso shiai olulu meprokshitsü mesüra COVID-19 agi shirangertem mesüra parnok kibongtem mesüra healthcare workers mesenmetua mamshitsü ayongzük. Iba ama tensa ka nung sensotemi teyari tila ka agütsübjia kanga senti ta angatettsü mepishir. Künü anogo iba wara tembangtsü aser idangji asenoki temeimtep, tangatettep aser amalitep ajanga iba wara madak takok anguba jembiteptsü" ta MTLT-isa sangdong nung ashi.

Centre-i Covid vaccine dose lakh 4 tema agütsütsü

New Delhi, June 13, 2021 (Agencies): Covid-19 vaccine indang dose lakh pezü tema (4, 48,760) yangluzükogo aser taruba anogo ishika tsüngda Centre-i State aser Union Territory (UT) tem dangi yoktsü.

State aser UT sorkartem ket

nung vaccine dose 1.53 crore tema lir, ta Ministry of Health and Family Welfare (MoHFW)-i metetdaksü.

Tang tashi nung state aser UT tem nem vaccine dose crore 26 (26, 64, 84,350) tema agütsüogo, ta ministry-isa ashi.

Deobarnep 8:00 ako tashi nung vaccine dose crore 26 tema nungi dose 25, 12, 66,637 (raksa endokba dena) agiogo.

Linük ajungalen vaccine agütsüba maparen nung Centre-i state aser UT sorkartem nem Covid vaccine angati agütsür.

Covid-19 tashidak nokdangtsü atema senso shia teinyaktsü asem :

Tangar alidak teti teni tebang nembang mask temerük agiang;



Tangar den tsüktepa tenokdak aser temen;



Teti sapon agi teka metsükang.



Tir Yimiyim

Kohima yimti nung mürekmejuba sentong tenzüka lir



Dimapur, Aami/June 13 (TYO): Kohima yimti ya jana maliba yimti (Litter Free City) kumdahtsüsü meranga, Kohima Smart City Development Limited (KSCDL) aser Kohima Municipal Council (KMC) nati June 4, 2021 nü nungi tenzüka main highway kanga meranga mürek tenzüka lir.

Mezüng hopta atema Pilot Location ya TCP Junction nungi North PS Junction tashi alitsü shimtet aser meilongi highway tongtiba indang tanünga tesemtemi meraloka aotsü, ta Kovi Meyase, CEO, Kohima Smart City Development Limited & Administrator, Kohima Municipal Council ajanga sandong ka nung ashi.

Kohima Municipal Council (KMC) Collection point tem

nung jana ya anepdang 6:00 ako matongdang aser nikongdang 6:00 ako sülen ang indoktsü, ta KMC ajanga ashi.

Anepdang 6:00 ako nungi nikongdang 6:00 ako tashi ya "No Litter, No Garbage" ta amshitsü aser iba mapang aibelener dang senchi achitsü. Shishilempar dang mezüng aibelenba atema senchi sen 500, tanaben aibelenba atema senchi sen 2000 achitsü aser tasemben aibelenba atema Trade License agentsüsü lemtetogo. Nüburtema mezüng aibelenba atema senchi sen 200, tanaben aibelenba atema 500 aser tasemben aibelenba atema senchi sen 1000 achitsü, ta sandong ajanga ashi.

Customer aser senzüsemponger temi dokan shiai yuja aliba dustbin aser

lenmang nung dustbin yuja aliba amshitsüla, ta ashi. Shishilempar aser business establishment temi jana ya nikongdang 6:00 ako nungi anepdang 6:00 ako tashinung KMC Waste Collection Points nung yutsüsüla.

Iba ozüng ya KMC Inspector temi amshitsü aser Kohima Smart CCTV camera temi yaritsü.

Nüburtem danga gari todak nungi jana meindoktsü saka dustbin nung indoktsü mesüra kidangi bener oa indoktsü metetdaksü.

Kohima ya tang temürekba kumogo aser ibai nüburtem, ward sanitation committee aser lokti tentet balalai jana-reja ketdangsüba nung tashi angatepba ajanga lir, ta sangdong ajanga ashi.

Kohima Smart City aser Kohima Municipal Council ajanga maneni nübur ajunga dang "Litter Free Kohima" movement nung yaritepa jana indokba mapang shidak amshitsü aser medemer, kinunger, kidanger, customer aser colony nung awareness agütsüsü ajungshir, ta Meyase-i ashi.

Maneni Ward Sanitation Committee tem danga awareness agütsüsü aser pei tesem nung jana bendenba mapang mittsü metetdaksüogo.

Ao Senden ajanga asükhu lemsatep

Dimapur, Aami/June 13 (TYO): Ao Senden Federal Council züngsem N. Khatang Longchar, June 13, 2021 anepdang asüba osang angashia Ao Sendeni kanga sasaseta mang ayimer aser asür kibong aser kinunger den asüku

lemsateper, ta Ao Senden tir, Chubawati Longchar aser tongti zülur Imtipokyim nati sangdong ka ajanga ashi.

Pa asüba ajanga asen Ao Kin asoshi lenir tajung ka samaogo aser Ao Senden nung kechiaia melentsü makokba

nokdang tajung ka samar, ta sangdong ajanga ashi.

Tsüngremi asür kinunger nem alimai magütsüetba anisüngzük molungjang agüjangma, aser asür nüla anisüngzük dak yujangma, ta Ao Senden sangdong ajangasa ashi.

MTLT ajanga COVID-19 agi shiranger atema Helpline tenzüker

Dimapur, Aami/June 13 (TYO): COVID-19 agi shirangertem, talisa Mokokchung jila nung alirtem temang anepaluba aser mozü bushiba mapang timtem balala ajuruba osang angazüka shirangertem yaritsü atema Mokokchung Town Lanur Telongjem ajanga 'Helpline' ka tenzükogo, ta MTLT tir Aolong Imchen aser MTLT Grievances Cell indang convener, Imkummeren Jamir nati sangdong ka ajanga ashi.

Temetetsü kar:

- i. Iba Helpline ya Mokokchung jila nung COVID-19 agi shiranger kin/nisung ajunga yaritsü atema tenzüka lir.
- ii. MTLT ajanga shirangertemi timtem ajuruba ajemdahtsüsü aser healthcare nung inyakerkem khuret pungbadakja akokba

lenmang nung osang- tsüsang prokshitsü.

iii. Shiranger temi molungra, MTLT ajanga nüngdakba anepalutsüsü asoshi parnok indang photo identity card aser address tejangja WhatsApp ajanga MTLT dangi yoktsü mepishir.

iv. MTLT ajanga RTI aser Legal Cells tem amshir aser healthcare system indang inyakyim ajak mita repranger. Nübur ajunga, talisa shiranger aser yariteper dang parnoki COVID-19 tashidak den raraba mapang timtem mesüra tim masüba ajangshibatem, kokra noksa aser video tangoker MTLT dangi WhatsApp ajanga yoktsü ajungshir. Iba amala osang agütsürtem tenüng temai madoktsüsü. Aser tim

masüba kuli tejangja ngutetra mapang shidak nung tapet mera agitsü.

v. MTLT ajanga nübur ajunga dang olulu meproksü aser COVID-19 agi shiranger aser kinungertem, healthcare nung inyakerkem metsük-mokonga mamshitsü saka molungsoa yariteptsü ajungshir. Iba ama kodanga majangshiba tensa nung tila ka agi yaritepba ya tongtipang ta nüburtemi angatetsüla. Iba tashidak wara ya süitema aotsü imlar aser nisung meimchir teti alitsü, aser künü anogo külemi mener temeim, tangatetba aser amalitep agi iba tashidak wara madak takok anguba jembitsü imla atar, ta MTLT ajanga ashi.

Iba Helpline nungi teyari agitsü asoshi agüja aliba nisung den parnok indang mobile number nung jembitsü akok:

| Tenüng | Designation | Telephone No. |
|------------------------|---------------------------|---------------|
| 1. Aolong Imchen | Convener, Grievances Cell | 8787612471 |
| 2. Lanuakum Imsong | Member, Grievances Cell | 8131009944 |
| 3. Imkummeren Jamir | President, MTLT | 9436006322 |
| 4. Martoshi Longkumer | Vice-President, MTLT | 8974352665 |
| 5. B. Merang Longkumer | Treasurer, MTLT | 9436006296 |
| 6. Imtimongba Imchen | Senior Executive | 8732055880 |
| 7. Temsukaba Kichu | Senior Executive | 8787620256 |

Governor Ravi-i Asür Padma Shri Piyong Temjen asükhu lemsatep



Dimapur, Aami/June 13 (TYO): Hindi oshi nung takotet Padma Shri Piyong Temjen Jamir mapang talangka shiranga arur June 12, 2021 nü Dimapur nung asüba osang angazüka temolung korema jashir, ta Nagaland Governor, R. N. Ravi ajanga asür kinungsü Pangertula Longkumer dangi züluba shidi ka nung shia liasü.

Padma Shri Piyong Temjen Jamir, shiba Nagaland nung Rashtra Bhasha Prachaar Samiti Wardha indang kongsang, Rashtra Bhasha Hindi Training Institute nung principal ka liasü, pai Nagaland nung Hindi nungtugu kümdaktsüsü asoshi mapa tajung jenti inyakogo, ta ashi.

Pai Hindi oshi ajanga Naga nunger tar nunger otsü aser

kenshi-oshi linük tesem ajunga süngdaksüba nung yaria liasü. Kenshi-oshi aser shisaliok wadang nung pa nem sempet jenti agütsüogo, aser item rongnung 2018 küm agütsüba Padma Shri sempet dena lir.

Pai kenshi-oshi nung shilem tulu agiba aser nisung meimchi ajunga adianu ama angatetba asoshi alimai pa teti züngshitsü.

Pa asüba ajanga linük nung kenshi-oshir aser teshisadanger tejangja nübu ka samaogo.

Naga nunger aser kü tenüng nung ni asükhu lemsateper. Tsüngremi mangyimer kibong nem tashi agüjang ta sarasademtsür aser asür tanüla teti tatem maka tesunep nung anisüngzükjangma, ta R. N. Ravi ajanga ashi.

Dimapur nung Security Forces temi NSCN (R) züngsem ka apu



Dimapur, Aami/June 13 (TYO): Security Forces temi police den lungjemer June 10, 2021 nü general area Padampukhuri, Dimapur nung operation ka agiba mapang NSCN (R) züngsem ka pua liasü.

Osang tejangja kar nung ajemdaker state police den lungjemer Padampukhuri, Dimapur operation agiba mapang Security Forces temi

NSCN (R) züngsem ka ya apu aser pa ket nungi point 22 pistol ka den magazine, point 22 indang injang pongu aser Indian Made Foreign Liquor (IMFL) cases asem nguteta lasü.

Pua alisang den pa ket nungi ngutetba oset ya maneni bushisüngdangtsü atema East Police Station, Dimapur nung agütsüogo, ta sangdong ka ajanga ashi.

Yali yimtsüng nung alir ajak COVID-19 mozü agitsü

Dimapur, Aami/June 13 (TYO): Tuensang district kübok Chang nunger yimtsüng ka, Yali, nung temsüa alir ajunga COVID-19 mozü agitsü molungtetogo. Iba dak sendakba nung ADC, Tuensang, Ajit Kumar Verma, IAS den SDO (C), Rohit Singh, IAS aser SDPO, Tuensang, Kanchan Kumar Kandpal, IPS

nungertemi Yali yimtsüng nung tekülem ki kima June 13, 2021 nü special vaccination drive ka tenzüka liasü.

Yimtsüng nung lenirtemi tangatetba tajung nung yimdaklir mozü agitsü temsüa alir ajunga COVID-19 mozü agitsü lemtetba atema ADC ajanga pelaba lemsatepa liasü. (Maneni tapak 3 nung...)



Mizoram nung Guinness World Records otsü yanglur Pu Ziona Chana süogo. Pa arishi küm 76 tain liasü. Deobar nikongdang 3:00 ako meta Trinity Hospital, Aizawl nung pa asü. Ziona-i kinungtsü 38 aser tanur 89 toktsür alima nungi pilaogo. Mizoram Chief Minister Zoramthanga-ia Twitter nung state ajak tenüng nung Chana mangyimba metetdaksüogo. (Aizawl, June 13)

Vaccine agiba sorkar mapa inyaker tem office-i aotsü tuyur

Guwahati, June 13, 2021 (Agencies): Assam nung COVID-19 vaccine dose anaprong agiba sorkar mapa inyaker ajak June 14 nungi office-i arutsü tetuyuba agütsüogo. Assam sorkar office tem nung mapa tiptema inyaka aotsü atema iba telemetba agi, ta M.S. Manianna-i ashi. "Assam sorkar mapa inyaker

shirnoksa Covid vaccine indang dose anaprong agiogo, nenok ajak June 14 nungi office-i arutsü tetuyuba agütsür. Iba ya sorkar office tem nung mapa shitak inyaka aotsü atema lir" ta sorkar sangdong ka nung metetdaksü. Tang tashi nung Assam nung vaccine indang dose 47,57,898 agütsüogo, ta state health minister Keshab Mahanta-i

ashi. Nisung 38,40,614-i mezüng dose aser 9,17,284-i dose anaprong agiogo, ta paisa metetdaksü. Tesüiba ghonda 24 tsüingda nisung 84,031 nem vaccine agütsüogo. Assam sorkar ket nung tang vaccine 5,23,950 anünga lir aser iba nungi dose 3,56,530 ji arishi küm 45 ser temapur atema lir.

Mizoram nung nisung 346 dak Covid-19 putet

Aizawl, June 13, 2021 (Agencies): Deobarnü Mizoram nung nisung 346 dak COVID-19 putet aser parnok züingsema nisung 15,000 adenogo. Honibarnü sample 3,866 tendangba nungi sample 346 nung COVID-19 putet aser anogo ka nung Covid-19 puteter shilem 8.94 liasü, ta ketdangsiiri ashi. Tang tashidak timtiba putetba dstrict rongnung Lawngtlai district alitsü, kong iba district nung nisung 154 dak Covid-19 tashidak tasen puteta, Aizawl district ajangtetogo. Ketdangsiir sangdong ajanga angazükba agi, June 10 aser June 11 nü Lawngtlai district tesülen Karlui yimtsüing nung iba tashidak agi kangshirtem bushia liasü aser internet connectivity majungba ajanga osang yakta

magutsutetba sülen Deobar anogo ang iba osang metetdaksü. Lawngtlai District dak alaka, Aizawl district nung nisung 130, Lunglei district (22), Siaha district (20), Kolasib aser Champhai district nung nisung tenetnet, Saitual district (3), Serchhip district (2) aser Mamit district nung nisung ka dak iba tashidak putetba osang angazükogo, ta pai ashi. Tashidak tasen puteter rongnung tanur 59 dena lir, ta paisa ashi. Parnok rongnung nisung ka ainlen senzüba osang lir aser tanüingba ajak - 345, pei pei talidak putet, ta ketdangsiiri ashi. Patient 346 rongnung, nisung 142 shi iba tashidak temaitsü aliba osang jangjaogo; kasa mapang, nisung 196 dak iba wara temaitsü agi timtemba

mali aser nisung 8 tashi iba wara temaitsü agi kangshiba mesüra timtem maliba osang ano mangazük, ta pai shisem. Tang, Mizoram State nung COVID-19 tashidak puteter nisung 15,267 tashi tuogo aser parnok rongnung nisung 3,660 shi iba wara agi shirangdar. Ano külen, Honibarnü taneptsü angur nisung 187 tashi densema, state nung iba wara nungi taneptsü angur nisung 11,545 kümogo. Mizoram nung iba wara adoker külen nungi sample 4,31,807 tashi tendangogo. State immunisation officer Dr. Lalzawmi-i ashiba agi, Honibar tashi nung nisung 2,85,982 nem vaccine agütsüogo aser parnok rongnung nisung 53,226 shi vaccine indang tanabuba dose agiogo.

Assam State Zoo nung shiruru tasen bener arutsü

Guwahati, June 13, 2021 (Agencies): Assam State Zoo cum Botanical Garden nung bendanglen nungi shiruru tasen kar bener arutsü terenemba lir. Israel aser Czech Republic nungi zebra pezü aser 'white-winged wood duck' pezü tashi Guwahati kübok lapoka aliba zoo yakta tonga arutsü. Assam forest & environment minister Parimal Suklabaidya-i ashiba agi, Reliance Industries den MoU züingzüktepba sülen, black panther ana den melenteptsü asoshi Israel nungi zebra ana

bener arutsü sentong lir. Gujarat kübok Jamnagar nung Greens Zoological Rescue and Rehabilitation Kingdom den longjemer achaayangba exchange programme kübok, taküm January ita black panther ana yokogo. "Item shiruru tasen anioktsü asoshi zoo nung maparen renema lir," ta minister Suklabaidya-i ashi. Suklabaidya-i ashiba agi, June 11 nü Black Panther techanu ana mepu aser tesuiba ita ka tesadang nung iba shiruru techanu ana mepua lir.

Ayi/rem mejakba shiruru atema, anogo tenet tsüingda hydroponic system ayi lanu jenti meyteta lir, ta Suklabaidya-i ashi. Iba hydroponic telungtet nung adokba ayi ma nung güntok, mesü, nilgai aser blackbuck tem anogoshi chiemer. Minister-i ashiba agi, shirurutem aser zoo nung inyaker tem atema tang tangbo iba zoo lapktsü sentong mali. "Covid-19 tensa tajungba maküm tashi, iba zoo lapoktsü asoshi sentong mali," ta pai shisem.

Piles Cure Centre - Kabiraj dang alakteta pelaba metetdaksür. Piles, Fistullah, Gastric, Sinus, itching, Tonsil-Ajma aser Diabetes agi ni kangshia liasü aser Rectum nungi azü alu dang mapang talangka item timtem nungi junga taneptsü mang. Ajisiüaka, tang H. Umar Chesam contact no.8416087414 / 7627998690
Address: Burma Camp 2nd Police point opp. tetuyuba nung anidaka surgery kecha magii (non-surgical) anepalur anogo ishika tsüingda ni taneptsü ngua liasü aser iba sülen tanü tashi kü temang nung timtem kecha mali. **Time: 9 AM - 5 PM -Yours sincerely - Amenla Longchar, Add: Duncan Basti**



Arunachal yim 5 nung 100% vaccination coverage tongtetogo

Changlang, June 13, 2021 (Agencies): Arunachal Pradesh kübok Changlang district nung yim pungu nung arishi küm 45 ser temapur ajak nem vaccine agüja 100% vaccination coverage tongtetogo. Yim punguji New Changlang, Longri, Namchik Havi, Kachang aser Maithingpum lir. EAC Mary N Taloh, SDO Rakesh Rai aser EAC Namrata Bhatt nungertemi anir

vaccination teloktemi iba mapa inyak. Iba alizüing atongtsü atema DC Dr. Devansh Yadav lenisüba kübok medical aser administrative teloktemi door-to-door vaccination ao. Parnok den külemi panchayat aser public lennirtemi yaritepba ajanga 100% vaccination coverage tongtet. Ketdangsiirtemi taruba hopta ano yimtsüing kar nung iba alizüing tonga inyaksü sentong lir.



June 13, 2021 nü AVSM VSM, GOC-in-C, Eastern Command, Lt Gen Manoj Pande-i Shillong nung HQ EAC semdangdang agiba noksa angur. Tanü Lt Gen Manoj-i Air Marshal Amit Dev AVSM VSM, AOC-in-C EAC den defence onük lemsatepa liasü. (Shillong, June 13)

Tinsukia nung nisung ka tepset

Guwahati, June 13, 2021 (Agencies): Assam kübok Tinsukia district nung Korjonga yim dak Honibarnü nashi auyar ta temolung melemi bilemba nisung ka tepset. Tasüsangji arishi küm 34 tain Sarat Moran ta jangjaogo. Baghjan police-i Korjonga yimtsüing nungi Moran kümzüka liasü aser Doomdooa kübok FRU hospital-i anir ao saka pa kanga mejungi yirur aliba ajanga taküm mekümzüket. "Iba lendong dak sendakba nung onoki nisung 12 puogo aser parnok dang asüingdangyatsü tenzükogo. Tasüsang temang nung oset techira kari yirutsüba zübotem liasü aser post mortem report atar," ta Tinsukia SP Debojit Deori-i ashi.

"Tasüsang tebu tanuboi FIR agütsüba nung ajemdaker Indian Penal Code kübok ken o benokogo" ta Deori-i ashi. "Sarat ya nashi auyar aoba maparen nung dena ali mesüra dena maliba nung tangbo osang tejangja ka magütsütettsü. Ajisiüaka, taoba mapang nunga, tanga ken o nung pa pua liasü," ta Deori-isa ashi. Tasüsang ya medemer ka kidangi mejangi ao aser pa ya nashi auyar nisung ta temolung melemi bilema yimertemi pa apu aser tepset. Sarat ya masüadang yimertemi pa kanga mejungi rishikangshia liasü. Sarat tepsetertem yagi pa temang nungi shi rangzüka aser zübobang nung metsü niloktsü, ta osang angazükter.

Yali yimtsüing nung alir... (Tapak 2 nungi...)

Ibai yim dak-yimtsüingtem nung mozü agiba maparen takok ngua inyaksü asoshi mezüingbuba aser tongtipangtiba mera ka alitsü, ta pai ashi aser district nung danga yimtsüingtem danga COVID-19 den raraba nung kasa amalitep alitsü ayongzüka liasü. District Task Force on COVID-19, Medical Department, CBLT office aser ECS lungjemer district kübok

yimtsüing ajunga ka khen ka, ta mozü agütsütsü sentong tenzüka nung shilem ka ama iba yimtsüing nung COVID-19 mozü ya agütsür. Vaccination drive mezüingbuba nung nisung kar mozü ya agia liasü, saka CBLT ajanga District Task Force den shisa lemsatepa yimtsüing nung nüburttem nem iba mozü indang kanga junga angatetdaksüba sülen yim daklir ajunga nem mozü agütsütsü lemteta liasü.



TIR YIMYIM

YIMOBILEM (EDITORIAL)

DIMAPUR TENTONÜ, AAMI (JUNE) 14, 2021

Tsüngrem nem khuret onsara agütsür asü?

Asenoki Tsüngrem dak amangba ya onsara talika junga amanger asü, tai amanger ta bilemstsüsa asen lima nung asenoki inyaker. Aji oda, asenoki Tsüngrem nem nungloksüba mapatem ya jungjunga bilemdangra, asenokbo kecha teinyaktsü maka Pa nem dang nungloka toktsür amai asenoki angatetsü. Tsüngremji ajak madak Kibuba, takarsang aser temoatsüsang Tsüngrem ta asenoki amanger, anungji asenbo mapai maotsü aser meinyaktsü saka asen mapa nung moajang ta Pa nem dang nungloksür. Asenokibo mashimashika dang inyaktsü saka Tsüngrem dangbo aika moajang aser takok tulu agüjang ta asenoki sarasademer. Tetezü, asenokbo mapaia mao odang kazütsü mesüra inyakyonga mashimashi ka dang inyaktsü saka Tsüngremi asenok moatsütsüla ta asenoki amanger. Ano, asenoki inyaktsüba mapa ka ser nung asenoki Tsüngrem nem dang nungloksüba mapa kaji, alima nung ochimashi mapa inyakbatem yaa Tsüngrem nem dang bushisüngdanga inyakdaksüner. Ibayongji, asen lima nung kinü tanur nungi shir tantsür tamburtem tashi angutsüba teyari shitak menguaka, asenokibo mebushir saka Tsüngrem nem dang ochimashirtemjia bushitsü nungloksür. Tanüa asenok alima tashidak wara tesashi peteka den ya chiyongtsüa mangu küma rarar, saka mozü kidang angatibo mozü jang kata mangur. Asenoki itemji kodaser mangur, shibai achi ta bushitsü melen Tsüngrem nem dang nungloksür. Iba amai alima nung asenokbo teinyaktsü kecha maka küma Tsüngrem nem dang ajak nungloka toktsüba ya Tsüngremi kechi bilema alitsü ta aiben shisadanger. Iba amaisa asenok lidi süra asenok nübertemang kotak nung lir, Tsüngremang alima nung ali tajungba ta bilemer. Tanga lima nungbo Primary Health Center ka nung MBBS doctor ka alitsüla ser mali nung, yimkong jazüka longkak aita government dang meshitsü. Ajisüaka, asen lima nungbo Sub Centre aser Primary Health Centerji-bo yutsür Community Health Center nunga shitakba agibo, Medical Specialist pezü, Surgeon ka, Physician ka, Gynecologist ka aser Padiatrician ka tabosa alitsüba ser nung, MBBS mesüra Dental mesüra Ayush doctor ka nemang reprangdaksür saka nübertemi ola madoker aser shirangdang item doctor-temi anepalu mesütet timtem tuluba ajurudang, ajia Tsüngrem nem dang nunglokja taneptsü meshir. Community Health Center ka nung Surgeon alitsüla ser nung maliba ajanga operation magitet nisung asür, Physician maliba ajanga tashidak junga meputet tamajungba kümer kimonglumong yoka tangalen taneptsü bushia senzür, Gynecologist maliba ajanga tetsür aika tashidak meputet cancer kümdaksür aser tila tanur doctor Padiatrician maliba ajanga tanurtem aika mozü tai agir taneptsü mangu timtem lendong ajuruba otsü aika lir, saka asenoki itemjia Tsüngrem nem dang nungloksür. Mozü kidang doctor alitsüla ser nung maliba aser mozü angutsüla ser nung manguba ajakji Tsüngremi dang inyaktsü ta bilema Pa nem nungloksür. Kasaji yaküm küm nungi tang tashi asenok ajak Covid wara agi timtem takoksa jenti ajurua arudagi. Iba ama tashidak wara tulu nungi nübertem kümzüksü asoshi center sokar nungi sen yoker, arogo, lokti tentet aser kija kibongi mozü kidang nungdakba dena alia agütsür. Ajisüaka, tanü tashi sen aser teyari agütsüba yari mozü kidang nübertem taneptsü angutsüsa nungdak merenemtetba angur. Asenoki shimteta yutsüba yimsüsürtem rongnung karbo pei constituency nung aliba mozü kitem jenjang metetnüa maitba purtema alitsü. Ajisüaka, asenoki item ajakji Tsüngrem nem dang nungloka toktsür. Iba jagi taoba hopta nung asenoki iba osangkaket nung, Center government nungi Nagaland atema Covid-19 tongpang nung amshitsü yokba sen ajak yimsüsür aser tulurtemi chia adok nunga koma süla (?) ta asüba nung shisalemsatepogo. Iba ama tensa tia ka nung, sen ajak ketdangsertemi chiadoker, asenokbo sen makaba agi treatment-a magitet asür aser asütsü, saka asenoki itemjia Tsüngrem nem dang nungloksür. Aji oda, sensaker aser nübertem meyong chitsürtemjibo Tsüngremi merenshitsü ta asenoki bilema Tsüngrem nem dang nungloksür. Ajisüaka, Tsüngremi itemji merenshi atadang asenok ajak sümatsü, kechiyong alima nung itemji bushia merenshitsüabajibo Tsüngrem mapa masü asenok public mapa lir.

OLEMSABANG

TEYARITEPER AYUBA TSÜTSÜ KIBONG ASER AROGO TEINYAKTSÜ

~ Rev. Mapula Lemtur

(Yashi adok nungi...)

Kibur kati meteta alitsü mapa kar

- Teyariteper nem ki tila mesüra room tila, ki nungi pilaa mesüzüksütsüla (ner kiji kanga temesü mesüra)
- Oja, oba, odi, oya, tenu, tebu jadakja züngoka amshiba jagi asen dak temulung alemer.
- Kibur aikati sentepi meyoker tasa ashir. Akok tashi sentep aser nungdak saisapong nung telemtet mapangjibo agütsütsüla aser tendaktsütsüla.
- Chiyungdang kasa langbang nung mener chiyungtsüla.
- Sentepsenchi, lokti nung kodang, kechi subotsü agitsü tim meteta subotsütsüla.
- Kibong tekülem nung teti pai/lai akokba shilem agidaktsütsüla.
- Jashiyunga o tamajung backward, uncivilized ta mashitsüla kechiyong memetetba agiang angazüki aru ta metetdi.
- Asen chir kidang T.V, mobile phone amshia toktsür teyariteper kisüng ak chi, nashi chi, süng, lung mapa inyakdaksüba jagi parnok dak inferiority complex tenzüker ta metettsüla. Ajaki pei akok tashi inyaktsüla aser yariteptsüla.
- Tajung kümdaktsütsü anir aru süra school tajungtiba nung züngdakjang. Iba dak sendakba nung teinyaktsü aika lir aser itemji abensatsütsüla.
- Teyariteper lir ta sür mapa ajak nemdaka toktsüba jagi asen chir mapa inyakba meraket (dignity of labour) samadaksür.
- Teyariteper yudi süra atakatem masü temoatsü angutsüsa ayutsüla.

Teyariteper atema Tsüngrem mangdang

Mapang ka nung Burma boundary nungi aruba aier chanu ka ozü kidang liasü. Deobar shia lar medemertem sendena ozü kidang kechi aka ibaji chia-jemersa senshi. Ni parnok den otsü jembidang otsü kar jangratemtsüka, karbo temulung shirangtsüka liasü. Parnok den sensaksem dang kü mulung nung item atema ya khuret tulu ta ajiteta sarasadem sayubentsü agütsürsa yok. Iba sülen kiyong nung kilirtem anitena kibur den tangatetep nung libalirotsütem shia, Tsüngrem O den parnoki lemsatepba khuret bena sarasademersa senshi. Iba wadang ya kangasa nungdak ta ajiteta ozü arogo (Tuli Town) nung women ministry-i agizüka 2007 nungi inyakyonga arudar. Küm nung anaben, khen khenbo asemben tasa atenshia liasü. Yaküm 2020 wara ajanga küm tatem nung dang khen katet.

Inyakyim kar

- Küm tetenzük nung küm piyung liyunga aotsü atema tesayuba agüja orientation ama agir.
- Summer sodi mesenshi tsüngda sendena sarasadem agütsür tesayuba o shir yoker.
- Küm tatem nung Christmas tenüng nung sentong yanglur sempet aser food package agüja pelatepbaji jangratemtsüka lir.

Iba sentep atema parnok azüngdak school authority den tongteprateper information agütsüdaktsür. Ki kibur nema information agütsür senteper. Sentep mapang parnok shia nem pei bilemba shidaktsür, tepela tejashi lemsateper. Parnok nem ken tendaktsür, Lai züngdaktsür, kechi shilem agitet itemji sadok sadoka agir. Tamasabo non-local evangelism ta sür tenzü, saka tangbo "asen den teyariteper" ta melener amshir. Iba mesükba YSS nung MTBA-i kilirtem atema mapa tajung inyakba lemsatepogo aser takoker arogoi media ministry agütsüabajia kanga tajangzük (effective) asütsü. Rev. Ponen Longchari yamai ashi, "Asenok ajaki oa missionary oa meinyaktet, saka asen kidangi teyariteper shirnok arua lidir, parnok taküm melenshir jenjang ka tongteter yokra ibaji missionary mapa tulutiba asütsü." Teyariteper dang ajungbaji missionary mapa nung shilem agir amai angatetsüla. Dimapur temeket nung Ao arogotemi teyariteper asoshi mapa tajung inyakba angudang ajakji pelar. Yamaji maneni teyariteper mesendoki Tsüngrem O agi yariteptsüabajia arogoi khuret abentsüla.

Arogoi bilemdangtsü kar

- Jila arogotem nung mapang apir küm nung khen anabenbosa kokra talia teyariteper den telongjem akatsüla.
- Libaliro, merükmeju, temang anema aliba, awashi sayutsü nungdaker.
- Tsüngrem akümtsüsuba jagi kibur dang meima akümtsüsubtsüsa Lai tesayuba agütsütsü nungdaker.
- Koda nisung ka lokti yanglushiba nung shilem tajung agitsü ajungshitsüla.
- Parnok sadoka tepilemba lemsatepa nisung shia den kokra lemsateptsüla.
- Lokti nung shilem agitsü ajungshitsüla.
- Parnoki lemsatepba dak peta tajungshi aser kar denbo personal counselling agitsüsa alir.

Kibur den teinyaktsü

Teyariteper kisüng den Tsüngrem O sayuba jagi teperi masü. Kibur memelenshira teyariteper kisüng melenshiba jagi mepirir. Kibur teinyaktsü aser temelenshitsü aika lir. Anungji kibur temeja den sensaksem/seminar akatsütsüla. Koda teyariteper dang ajungtsü, meima amshitsü, alima ozüngi teyariteper koma ayutsü melar ibala temetetsü den Tsüngrem O tesayuba den tajungshiteptsü mapang agitsüla. Kokra teyariteper aser kibur ka temeyoktep telongjem sentong tajung akatsüla.

Tatem nung ken-o aika jembiaka Tsüngrem temeim ne dak aser kü dak alinung dang takok angutsü. "Ni nisungtem aser kotak tenyartem oshi nung jembiaka, saka kü dak temeim melira ni takuba ola mesüra takushiba yin aküm" (I Korint 13:1). "Koba adianu pai angu pa dang pai memeimra ajiangla Tsüngrem shiba pai mangu Pa dang memeimtet. Shibai Tsüngrem meimer pai pei adianu meimtsüla" (I Yohan 4:20-21). Tamanger tajung Yisu meimer ka ama tenük agi anguba Tsüngrem noksa adianu meimba jagi asen tamang metendaktsüdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Odisha nung Hindu nungeri yimtsüng ka nungi Khristantem mindok



2008 kum Odisha kubok Kandhamal nung Khristantem jenti tepsetba anema 2014 kum August ita nung Odisha nung Khristantemi ochi temeden khanga longkak aitba noksa nung angur.

June 13, 2021: Odisha kubok yim ka nung Hindu nungertemi yim ka nung Khristantem amakba aser yimdak nung mindokba sülen Police-i first information report (FIR) ka benokogo.

June 8, 2021 nü Odisha nung Rayagada district kubok Sikapai yimdak Hindu yimsü alia amangertemi Khristantem ki raksatsüba sülen yimdak nungi mindok, ta Cuttack-Bhubaneswar Arogo nung putir Purushottam Nayak-i metetdaksü.

Tang Khristantemji arem anasa azüki yanglur jenoka lir, ta paisa ashi.

June 10 nü osangbener den jembidang putiri, "Khristantemi Kalyansingpur police station nung ken o ka benokogo aser iba tatalokba bushisüngdang tenzükogo. Iba yimdakji Hindu nunger kibong 32 aser Khristan kibong 8 liasü," ta metetdaksü.

Pastor Upajukta Singh-i ashiba agi, Sikapai yimdak Khristantem alibaji Hindu nungertemi maginer aser Khristantem kanga azükaruba

agi Hindu nungertemi nuk-merema liasü.

Pastor Singh-isa, tamalen-a Hindu nungertemi Khristan tsür ishika kanga mezüngmeshi aser tzübo raksatsüba agi Khristantemi tzü metateti liasü.

Rayagada district nung Khristantem anema inyakba kanga bulua ataloker.

"Tesüiba kum 14 tashi iba tesem nung Khristantem amokmerenyonga Khristantemi pei tamang jenjang nung akanga nokdaker," ta paisa ashi.

Sikapai yimdak Khristan ka tenüng agi, Nori Konjaka-i, "Parnoki onok meyong ki raksatsütsüa akok, saka onoki Yisu Khrista dak amangba tamangbo meraksatsütettsü," ta ashi.

Osangbener den jembidang Gloval Council of Indian Christians Tir, Sajan K. George-i, Rayagada district nung Khristantem anema inyakba ya tang tasen masü, ta ashi.

"Rayagada nung Khristantem anema inyakba ya tesempa agi inyakba lir. Onoki Odisha chief minister dang

loktiliba nung ozüng alema inyakba mapatem nokdangtsü aser nübur ajak kumzuka alitsü atema ajak nem security agütsüjang ta mepishir," ta paisa ashi.

2008 kum August 23 nü Odisha nung Hindu nunger lenir Swami Laxmanananda Saraswati khasetba sülen nungi state nung Khristantem reshikangshi tamajungba kumogo.

Hindu yimsü alia amangertemi Swami ya Khristantemi asalentong yanglur tepset, ta Khristantem nem tai tonglokja liasü. Hindu nunger lenir khasetba sülen ibaji mangyanga state nung hopta tenet tsüngda Khristan 100 dak tema tepset, nisung 56,000 talidak makai aküm, ki 6,000 aser Tenla ki 300 shi raksaja liasü.

Swami khasetba sülen mapang tatsüka tsüngda Hindu nungertemi Khristan pezü dak azükba sülen police stations-i anir ao. Police-i masü saka Vishwa Hindu Parishad lenir, Praveen Togadia-i ang Khristan pezü tenüngji sangdonga liasü.

ICC-i India nung Covid wara mapang nung Khristantem yari

June 13, 2021: India nung coronavirus wara tanaben prokba mapang anogo shia nisung 4,000 dak tema asü aser iba wara mapang nung sensakertem taliba timtemba mapang International Christian Concern (ICC)-i nisung aika nem teyari aser teimla agütsüogo, ta ICC-i metetdaksü.

Taoba ita International Christian Concern (ICC)-i mapatong ka tenzuka wara agi kongshiba Khristantem nem teyari agütsü.

Tangari melungsoa tenla agütsüba sen agi ICC-i India nung nisung meyirjang aika yariba den külemi Khristantem nem teimla agütsü, ta parnoki metetdaksü.

Tanü tashi nung ICC-i US

dollar 100,000 tashi bendenteta wara mapang timtemertem nem teyari balala agütsüogo. Tang tashi nung ICC-i India nung states/UTs 29 nungi 18 nungbo timtemer kibong 1,169 (nisung 5,845) nem teyari agütsüogo.

ICC-i maneni India nung Khristantem yaritsü, ta parnoki metetdaksü.

ICC-i India nung dang masü saka alima tesem ajungalen timtemertem nem chiyungtsü, medical teyari, süoshi aser emergency teyari balala agütsüogo.

Melungsoa tenla agütsürtem dang pelar aser maneni reshikangshi nung aliba Arogo atema sarasademjang, ta ICC-i mepishia metetdaksü.

ICC-isa wara tanaben prokba mapang India yimtsüngtem nung tenzükter pastor tem nem teyari agüja liasü. India nung wara prokba nokdangtsü atema Tenla kitem shibangba agi ter shilem aser tenla balala Arogo senpongi maiter, ibayongji pastor kibongtem aika kanga timtemba mapang nung ICC-i teyari agütsü.

Taoba ita ICC-i Khristantem dang India nung pastor tem yaritsü atema tenla agüjang, ta mepishiba sülen India nung local partners teyari ajanga ICC-i India kubok Telangana, Andhra Pradesh aser Karnataka state tem nung Arogo tasen tenzükter pastor 40 nem teyari agütsüogo.

ANOGO ABEN TSÜNGREM DEN

Khrista ne dak alibaji nütsüngsüba

Aji temeshi pur nem metetdaksütsü Tsüngrem temulung chia liasü: iba miim oji nenok dak aliba, paji sentsüwangshi teimla. Kolosi 1:27

Tetenzük nungi kotaker Tebu sentongji Pa chir tamangertem dak lidaktsütsüba liasü. Na Khristan ka süra Tsüngrem tabensaba ajak ne dak lir. Khrista takümüji ne taküm akümer. Kodang Khrista ne dak lidir, Pai kotaker temoatsü ajak ne dangi bener arur. Ne nungdak ajak nai kangki nung asüba aser shia aruba aser alima madak Kibuba dak nai angur. Kodang Tsüngremi na Pa mapa nung atentsü ajar, ne taküm ajanga Pai nungloktsüba mapa inyaktsü asoshi par chir ne dak lidaktsür.

Nü Khristan taküm asoshi ibai tongtipang lir. Nütsüngsüba tekolok temetetba aser Laishiba tekongtem temulung nung ayuba dang nungi tongtipangba lir. Ibai Yisu Khrista ne taküm nung sadoksadoka litettsüsa ne taküm Pa nem bendanga agütsüba lir.

Na ajanga mapa tulu inyaka na meketa aliba purtem dangi Tsüngremi jungkai adoka sayudaktsüner. Pai ne dak anogo shia ner kibongi Khrista ngua lidaktsüner. Tsüngremi ne taküm ajanga Pa temeim sayudaktsüner. Khristan taküm ka aliba aser ne taküm nung Khrista taküm alitsü melaba nung tepila tulu lir.

Taoba mapang Alabama nung pastor Glenn Steve Austin süogo



Steve Austin aser pa kinüngtsü Lindsey na noksa nung angur.

June 13, 2021: Taoba mapang Alabama nung pastor, arrshi kum 38 Glenn Stephen "Steve" Austin, gari ka nung sür lia angu.

Tamalen pai pa dak mental health timtem aliba lemsatepa liasü aser hotel takdang ka nung Laishiba tepima nung amer mozü tali chir pa sasa asütsü meranga liasü. Iba sülen pai mental health timtem alirtem aika yaria aruogo.

Police-i ashiba agi, Austin ya kaketzülur ka, podcaster aser life coach ka liasü. Taoba Honibar (June 5) nü pa Alabaster nung par kidang nungi aoba sülen sama aser Hombarnü ang (June 7) gari ka nung pa tasümgang angu.

Police-ibo pa soseta asü asütsüa akok, ta bielmer.

Taoba mapang youth pastor, Steve-i pai "Jesus Coaching," program tenzüktsü lemsatepa liasü.

2016 kum pai züluba kaket 'From Pastor to a Psych Ward: Recovery from a Suicide

Attempt is Possible' nung pa lanuwa pai timtem ajangshiba, pai kanga meima aliba par kinünger ka soseta asüba, pa dak mental health timtem aliba aser ministry mapa anenba indang lemsatepa lir.

Pai pa taküm alitsü metemsü ta bilema hotel takdang ka nung mozü tali chir pa sasa asütsü meranga liasü.

"Ni arrshi kum 29 asüba mapang nung ni kü taküm nung joko teimla mali, ta bilema hotel takdang ka nung Laishiba amer soseta asütsü merang. Ni mejangba nungi kodanga mesaaktsü atema sarasadema liasü. Ibaji kum tenet tejaklen liasü," ta pai 2019 kum lemsatepa liasü.

Austin-i züluba kaket asemji "Catching Your Breath: The Sacred Journey From Chaos to Calm", "Hiding in the Pews: Shining Light on Mental Illness in the Church" aser "From Pastor to a Psych Ward: Recovery from a Suicide Attempt is Possible" lir.

OLONG PAITEP # 5844

| | | | | | | | | | | |
|----|--|----|--|---|----|---|---|----|--|----|
| 1 | | 2 | | | 3 | | 4 | | | 5 |
| | | | | | | | | | | |
| | | | | 6 | | 7 | | | | |
| 8 | | | | | | | | | | |
| | | | | | | 9 | | | | |
| | | | | | | | | | | |
| | | 10 | | | | | | | | |
| 11 | | | | | | | | | | 12 |
| | | | | | 13 | | | 14 | | |
| 15 | | | | | | | | | | |
| | | | | | | | | | | |
| 16 | | | | | | | | | | 17 |

| | | | |
|-----------------------------|-------|----------------------------|-------|
| TIPIEN | | LANGTSÜNGLEN | |
| 1. Nüji masü | - (4) | 1. Jila tulu | - (5) |
| 3. Techinütsüka | - (6) | 2. Sarasademdang tembang | - (4) |
| 7. Aketa shirangba | - (5) | 4. Tarutsü indang ashirtem | - (6) |
| 8. Pi | - (6) | 5. Alia | - (5) |
| 9. Amena | - (5) | 6. Mojing | - (5) |
| 10. Kinü | - (5) | 9. Tai inyakba metet | - (5) |
| 11. Tanang masü | - (5) | 10. Medemer chijiba | - (6) |
| 13. Lenmang | - (6) | 11. Tatokba / Amadok | - (5) |
| 15. Nübo tedi | - (5) | 12. Anügdang masü | - (5) |
| 16. Tuoshi | - (6) | 14. Jabaso masü | - (4) |
| 17. Shiruru apuba temenatsü | - (4) | | |

OLONG PAITEP # 5843 TELANGZÜBA

| | | | |
|----------------------------------|--|---------------------------------------|--|
| TIPIEN : | | LANGTSÜNGLEN : | |
| 1. Tesangra, 5. Mungo, 7. Kisen, | | 1. Temesen, 2. Raksa, 3. Aon, 4. Aso, | |
| 8. Salem, 12. Semki, 14. Kilem, | | 6. Nile, 9. Alizüng, 10. Omen, | |
| 15. Kensü, 16. Sangpang. | | 11. Lemta, 13. Ola, 14. Kin. | |

ALOKBA O WARAKLA NA KIBONG TASEN :

Alokba o Warakla na kibong kümer ita asem sülen.

Warakla : Tambu, osang tajung ka shidi ni?

Alokba : Wa shiangma.

Warakla : Asen kibong nung ana den ano ka arusemstsüa no.

Alokba : Wonderful! Tanglokogo na?

Warakla : Mahako mahako, ina, ojala ana den khen semloka alitsü asüng arutsüa aharja!

Alokba : Ojanga!

Lilir : WhatsApp

TANÜBO NAI LANGZÜANG

Q. BAFTA TV Awards 2021 nung shibai Best Comedy Performance (female) award takok angu?

A. Aimee Lou Wood B. Daisy May Cooper
 C. Emma Mackey D. Mae Martin

(Taruba adok nung onoki langzüsü)

YASHI ADOK TELANGZÜBA : Both A and B

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Kabang

(n) temulung lemtetba nisung (bosom friend)

* Ni' kü tebilemba ajak **kabang** dangbo ashir.

Kapu

(n) kidong balala medemer tsüngda jatepba (term for friend from different clans)

* Bendangba küna kidong balala asüba agi **kapu** ta jateper.

Happy Birthday

TENÜNG : REJUNA
TASOBA ANOGO : 14TH JUNE
KÜM : 10
TALIDAK : NAGA UNITED VILLAGE 4TH MILE DIMAPUR.

Tsüngremi oyala REJUNA küm 10 abensaba anogo tashi temoatsüma nung len aneir aruba asoshi pa tenüng asanger. Ano tarutsü anogotem ajak nung taküm anema yuja lia kakat shisatsü poshiba nung takok tajung ngutetba ten nü madak tepela molamoshia lidakjang ta onoki sarasademtsür.

-Temeim Akümdong Tzüdir aser Kinnaren Tzüdir



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



1. Tenüng :

2. Tasoba anogo:

3. Küm : 4. Class :

5. School :

6. Talidak :

7. Salem osang :

SUDOKU # 5885

| | | | | | | | | |
|---|---|---|---|---|---|---|---|---|
| | | 2 | 5 | | 6 | | | 9 |
| 4 | 9 | 7 | | | | | 5 | 1 |
| | 5 | | | 9 | | 3 | | 8 |
| | 1 | 3 | | | 2 | 9 | | |
| 9 | | 4 | | 5 | | 2 | 6 | 3 |
| | | | 7 | | | 8 | | 4 |
| | 3 | 5 | | 8 | 1 | 4 | | |
| 2 | | | 9 | | | 1 | 3 | 7 |
| | 6 | | | | 4 | | 8 | 2 |

TELANGZÜBA # 5884

| | | | | | | | | |
|---|---|---|---|---|---|---|---|---|
| 2 | 6 | 5 | 1 | 4 | 8 | 9 | 3 | 7 |
| 7 | 8 | 9 | 5 | 6 | 3 | 2 | 1 | 4 |
| 3 | 1 | 4 | 9 | 7 | 2 | 6 | 5 | 8 |
| 1 | 9 | 3 | 4 | 5 | 7 | 8 | 6 | 2 |
| 5 | 4 | 7 | 8 | 2 | 6 | 3 | 9 | 1 |
| 8 | 2 | 6 | 3 | 9 | 1 | 7 | 4 | 5 |
| 4 | 3 | 2 | 7 | 1 | 9 | 5 | 8 | 6 |
| 6 | 5 | 8 | 2 | 3 | 4 | 1 | 7 | 9 |
| 9 | 7 | 1 | 6 | 8 | 5 | 4 | 2 | 3 |

OJANG LUTEP # 5429

ZTÜ :

NGNU :

ONGASER :

ZÜKTKÜMSÜ :

KASHIA :

KATE :

SAYMEU :

HITAS :

MALESA :

MAA :

OJANG LUTEP TELANGZÜBA # 5428

TELOK NUNG TAZÜOKBA KECHA MALIBA AJANGA JAPANGMAYIMI PEI SÜNÜTSÜ SÜDAKTSÜ

TAN HOPTA ATEMA - KOMA SÜLA ?

Q. Private mozü kidang Covid agi shiranger anepaluba jenjang (treatment charges) ya government-i sensaker lenji tera oa latettsü nunga koma süla ?

G-7 senden nung PM Modi-i wara anema longjemer raratsü ayongzük



New Delhi, June 13, 2021: Amongnü New Delhi nungi Ato kilonser, Narendra Modi-i video conferencing ajanga G7 Summit nung adenba noksa nung angur. Kasa noksa nungsa UK, US aser Canada nungi tongti lenirtema angur.

New Delhi, Aami/June 13 (Agencies): G-7 senden nung India Ato kilonser, Narendra Modi-i alima nung lenirtem dang "one earth, one health" kübok coronavirus wara anema longjemer raratsü ayongzükogo.

G-7 summit outreach session nung video conferencing ajanga jembidang Modi-i "one earth, one health" kübok wara anema lenirtemi longjemer raratsü ayongzükbaji German Chancellor, Angela Merkel-ia pusema liasü.

Ato kilonserisa tarutsü nung Covid mesükba wara balala nokdangtsü atema alimai longjemer inyaksü ayongzük, ta official sangdong ka ajanga metetdaksü.

Osang angazükba agi, Modi-i coronavirus vaccine aika yanglutsü atema tenokdangba

agentsü atema ayongzük, aser pai ayongzükbaji Australia densema linük aikati pusema liasü.

G7 outreach session 'Building Back Stronger - Health' onük nung jembidang Modi-isa India nung ajaki longjemer wara anema raraba aser wara anema raraba nung sorkar, industry aser lokti tentetemi longjemer inyakba metetdaksü.

Group of Seven (G7) telok nung züngsem linük tenetji United Kingdom, Canada, France, Germany, Italy, Japan aser United States lir.

G7 chair ama UK-i iba senden nung shilem agitsü atema India, Australia, South Korea aser South Africa linüktem nungi lenirtema jaoka liasü.

Alima nung rongsenkettsüing jenjang junga aliba linüktem nungi lenirtem June 11 nungi June 13 tashi Cornwall, UK nung iba senden menogo. Coronavirus wara tenzükba sülenbo tang mezüing G-& summit ayongzükba amener.

Tesülen Modi-i twitter ajanga, "@G7 summit health session nung shilem agiogo. Tawa covid wara mapang yariba atema partners dang pelar. Tarutsü nung wara balala prokba nokdangtsü atema India-i alimai inyakba pusemstsü. Meimchirtem atema onok tayongzükbaji 'one earth, one health' lir," ta metetdaksü.

G-& senden nung Modi-i tawa India nung coronavirus wara mejungi prokba mapang nung G-7-i India yariba atema pelaba lemsatepa liasü.

India nung ano nisung 80,834 dak Covid putet aser 3,303 asü

New Delhi, Aami/June 13 (Agencies): Tesüiba ghonda 24 nunga India nung nisung lakh 1 den tajemba dak coronavirus putetogo; tanü agi anogo trokbuba anogo shia coronavirus case lakh 1 den tajemba puteter.

Tesüiba ghonda 24 tsüingda India nung nisung 80,834 dak coronavirus putetba sülen linük nung coronavirus case ajak agibo 2,94,39,989 jungogo, ta Amongnü anepdang 9:00 ako nung Union health ministry-i


metetdaksü. India nung anogo shia coronavirus case tajemba putetyonga anogo shia iba tashidak agi nisung 3,000 dak tema asür. Tesüiba ghonda 24 nunga linük nung coronavirus agi shiranger 3,303 asü aser iba tashidak agi asür ajak agibo 3,70,384 jungogo.

Tesüiba ghonda 24 tsüingda iba tashidak agi shiranger 54,531 anepogo aser tang teshirangdakpur 10,26,159 dang lir.

Iba tashidak agi shiranger shilem 95.36 (nisung 2,80,43,446) anepogo.

Tang anogo shia iba tashidak positive putetba shilem 4.25 dang kümogo; tesüiba anogo 20 tashi positive putetba shilem 10 den tajemba lir.

Amongnü anepdang ICMR-i, Honibarnü linük nung coronavirus samples 19,00,312 tendangogo aser tang tashi nungbo samples ajak senteper crore 37 dak tema tendangogo, ta metetdaksü.



June 13, 2021 nü Raj Bhavan, Lucknow nung Uttar Pradesh Angh, Anandiben Patel-i ketdangtsüa Justice Sanjay Yadav nem tenangzükba agidaksüba noksa nung angur.

Left party temi totzü jenjang ajemang ta akhanger

New Delhi, June 13 (Agencies): Amongnü Left party temi külem sangdong ka ajanga Centre sorkar dang petrol aser diesel totzü jenjang ajemang, ta akhangba den külemi sorkar dang mozü aser osettsüset balala jenjang atuba aziökang, ta takhangba agütsü. Külem sangdong nung sign asürtemji CPI (M) general secretary Sitaram Yechury, CPI general secretary D Raja, All India Forward Bloc general secretary Debabrata Biswas, Revolutionary Socialist Party general secretary Manoj Bhattacharya aser CPI (M-L) general secretary Dipankar Bhattacharya nunger lir.

"Covid wara mapang nung nüburtem yaritsü melen May 2 nü assembly election osang sangdongba sülen nungibo sorkari totzü jenjang 21 ben tuogo, aser ibaji ajanga

wholesale price index (WPI) jenjang kanga tuogo," ta Left party temi metetdaksü.

"April ita nung chiyungtsü jenjang shilem 5 jungnüa tuogo aser osettsüset jenjang shilem 9.01 tuogo. Item chiyungtsü/ osettsüset agi retail markets atongdangba nüburtem dang jenjang tali tur meshitsü," ta sangdong nung shia lir.

"Linük rongsenkettsüing jenjang kanga majungba, mapa manguba tebilemstsü tamajungba akümba aser aya-tzüra mapang nung iba ya ataloker. Oset alizüka black-market inyakyim bulua ataloker. Modi sorkari black-market nokdangtsüla," ta sangdong nung shia lir.

Left party temisa sorkar dang income tax paying bracket nung maliba kibongtem nem ita 6 tashi ita shia direct cash transfers ajanga sen 7,500 agüjang, ta takhangba agütsü.



New Delhi, June 13, 2021: Amongnü New Delhi kübok Madanpur Khadar nung Rohingya Muslim refugee ka lar ki rongdokba tesem nung nokdaka aliba noksa nung angur. Honibar ayaterm 11:50 ako meta Rohingya refugee camp nung mi lendong atalokba mapang Rohingya Muslim refugees 270 aliba ki 56 rongdokogo.

Uttarakhand Assembly nung Opposition Lenir, Indira Hridayesh süogo



New Delhi, June 13 (Agencies): Uttarakhand Assembly nung Opposition lenir, Indira Hridayesh Amongnü New Delhi nung temelungjang tashidak agi süogo; la arrshi küm 80 liasü.

Congress lenir tain, Indira party senden ka nung adentsü atema New Delhi nung aliba Uttarakhand Sadan-i ao aser Delhi nung lia asü, ta lar jabaso Sumit Hridayesh-i metetdaksüba osang Pradesh Congress vice president, Suryakant Dhasmana-i metetdaksü.

Indira Hridayesh ya Haldwani nungi Congress MLA liasü aser Uttarakhand nung Congress lenir tongti liasü. Taküm April ita nung la dak Covid-19 putet aser la shirang anepba sülen temelungjang operation agia liasü.

Honibarnü party in-charge Uttarakhand, Devendra Yadav-i New Delhi nung ayongzükba senden nung lai shilem agia aden.

La asüba osang angashia Ato kilonser, Narendra Modi aser

Congress lenir, Rahul Gandhi na densema yimten lenir aikati mangyim jashi lemsatepogo.

Ato kilonseri twitter ajanga, "Dr. Indira Hridayesh leniba nung lokti atema mapa tajung aika inyakogo. La ya legislator tajung ka liasü aser yimsüsüba tsütsü lai aika ajangshia liasü. La asüba atema jashir. Lar kibong aser la pusemertem den mangyim jashi lemsateper," ta metetdaksü.

Hindi oshi agi Rahul Gandhi-ia twitter ajanga, "Dr Indira Hridayesh asüba osang angashiogo. La ya Uttarakhand nung Congress party sendakteptsür ka liasü. Lai akumli piyong nübur aser Congress tenzükba aruogo. Lai loktiliba aser yimtenren atema mapa tajung jenti inyakba ajanga aika ajungshitsü. Lai meimbatem den mangyim jashi lemsateper," ta metetdaksü.

Congress general secretary aser taoba mapang state chief minister Harish Rawat, AICC general secretary Priyanka Gandhi Vadra, Chief Minister Tirath Singh Rawat aser Pradesh Congress vice president Dharendra Pratap nungeria mangyim jashi lemsatepa liasü.

Hridayesh ya 2012 küm nungi 2017 tashi Uttarakhand nung Finance Minister inyaka liasü aser higher education densema ministry balala nunga inyaka liasü.

Mask masemba atema Brazil tir dang senchi achi

Sao Paulo, Aami/June 13 (Agencies): Honibarnü Motorcycle rally ka nung mask mesemi shilem agiba atema Brazil tir Jair Bolsonaro dang senchi USD 100 chiogo.

Sao Paulo nung far-right tiri anir "Accelerate for Christ" rally nung motorcycle anirtem aikati shilem agia liasü. Iba rally nung tir-i open-faced helmet ka asema dak alaka mask masem, koba state nung health dak sendakba nung tetuyuba agütsü aliba anema liasü.

Taruba küm election matong tsüingda Bolsonaro-i iba amala mesükba rally tem aika ayongzüka agia arudar, aser Honibarnü rally mapang Sao Paulo Angh Joao Doria-i jelia tekümdangtsü agütsür aliba anema pai inyaksangshi. Doria aser Bolsonaro na ya yimden yimsüsüba tsütsü anemer lir, shibai tir-i state tetuyuba sülen manidakra senchi achitsü ta shiadoker liasü.

Covid-19 wara azüoktsü atema inyakyim balala benoka inyakba dak sendakba nung Doria aser tanga Angh tem den Bolsonaro mangatetep adoka



Carbis Bay, Cornwall, England nung G7 Summit alidang linük ana senden amentsü atema Canada Ato Kilonser Justin Trudeau-i German Chancellor Angela Merkel pelashishia agizükba mapang tangokba noksa ka yangi angur.

Israel nung Netanyahu yimli tatemleni arur

Jerusalem, Aami/June 13 (Agencies): Israel indang parliament-i Deobarnü sorkar tasen ka tentettsü atema agizüktsü imlar, aser Ato Kilonser Benjamin Netanyahu-i küm 12 yimsü asüba tembangtsü.

Sorar tentettsü teimla aliba, aser kodanga majangshidangba coalition ya parliament nung menden ka agi timba lir.

Deobarnü vote agütsütepba nung sorkar tasen ka tentetra, Israel nung küm ana dak tali yimten tasü ama lia aruba tembangtsü, koba mapang election asem agiaka meja-meja takok angur meliasü.

Centrist lenirtem den tashi lemsatepa yimsü asütsü tezüngzüktep yangluba kübok right-wing nationalist Naftali Bennett ya ato kilonser akumtsü renema lir.

Coalition tezüngzüktep kübok Yamina party tekolakba, Bennett yagi September 2023 tashi ato kilonser inyaksü aser iba sülen küm ana atema Yesh

arudar. Brazil nung covid agi tang tashi nung nisung 485,000 süogo aser tashidak agi asürtem rongnung United States sülen Brazil tanabuba jenjang nung lir.

Tir-i, kidang nungi mainshitsü aser mask asemtsü benokba aija arudar aser iba melena chloroquine aser hydroxychloroquine amshitsüang ajungshir, koba bushitsüingdang balala ajanga Covid-19 atema kecha teyari mali ta ngutetogo.

Rally nung nüburtem den sensaksema mapang, Bolsonaro-i face mask asema nokdangtsü atema nangzüker aliba nangzüksi aser ashiba agi, pai Covid-19 vaccine agir alirtem mask mesemdaktsütsü atema jenjang agitsü.

State ketdangsurtemi ashiba agi, Bolsonaro aser par jabaso Eduardo, Infrastructure Minister Tarcisio Gomes nungeri mask masemba den rally mapang tetsüingda inyaksangshi masüba atema senchi chiogo.

Parnok asemprongla dang senchi reais 552.71 (USD 108 shi) chiogo.

Yanhu nung gas pipe ka apokba sülen nisung 12 asü



China meyong CCTV nungi video ka sayaba nungi agizükba noksa ka nung China tiyonglen Hubei Province kübok Shiyan city nung gas pipe apokba sülen firefighter ka lendong atalokba tesemi aoba noksa nung angur. Central China nung gas line ka poka nisung longsoa aliba kiyong ka nung ji poksa nisung 12 asü aser aika yirua liasü.

Beijing, Aami/June 13 (Agencies): China kübok Hubei Province nung Deobarnü gas pipe ka apokba sülen nisung 12 asü aser nisung 37 kanga mejungi yirua liasü, ta official media sangdong ka ajanga metetdaksü. Zhangwan district kübok Shiyan yimti nung anepdang 6:30 ako shi nung iba gas pipe ya apok.

Osang balala ajanga ashiba agi, district nung shishilembadak kanga mejungi kongshiogo. Gas pipe apokba lendong nung nisung 12 asü aser nisung 37 kanga mejungi yiruo aser ki aika raksaogo, ta state meyong CGTN-TV-i metetdaksü. Hong Kong nung amendaker aliba South China Morning Post sangdong ka ajanga ashiba agi, nüburtem aika shishilembadak

Yimti ketdangsurtemi ashiba agi, iba tatalokba sülen nisung aika ki balala nung sabanga lir. Social media platform Weibo nung prokshiba noksa aser video ajanga teküzmükertemi ki chirepa aliba nungi nüburtem aninba nguogo. Iba lendong atalokba tera tang bushitsüingdangdar.

Iba lendong nung aonsotsü ayokertem aser aonsotsü aser breakfast alirtem dak kanga mejungi kongshia liasü, ta state media-i ashi.

Noksatem nung teküzmükertemi ki chireper aliba nung sabanga alirtem

aonsotsü alia aliba mapang aser aika kidang süngo jema aliba mapang iba gas pipe ya Shiyan yimti kübok Yanhu shishilembadak apok.

Iba lendong nung aonsotsü ayokertem aser aonsotsü aser breakfast alirtem dak kanga mejungi kongshia liasü, ta state media-i ashi.

Noksatem nung teküzmükertemi ki chireper aliba nung sabanga alirtem

Yimti ketdangsurtemi ashiba agi, iba tatalokba sülen nisung aika ki balala nung sabanga lir. Social media platform Weibo nung prokshiba noksa aser video ajanga teküzmükertemi ki chirepa aliba nungi nüburtem aninba nguogo. Iba lendong atalokba tera tang bushitsüingdangdar.

kümüzüksü merangba nguogo.

2013 küm Qingdao nung lendong atalokba den iba lendong ya mesükteper. Qingdao nung ali telung nung rema aliba gas pipe ka leak süa apokba sülen nisung 55 süa liasü.

Anogo ka tejakdang Guiyang yimti nung chemical amshiba facility ka nung gari ka nungi mim aketba methyl formate leak süa nisung ti asüba den nisung asem yiruba sülen tang Shiyan nung iba lendong atalokogo

Lendongtem ya timba safety standards shidak mebenokba, junga anepalu masüba aser ketdangsurtemi ochishia minyakba ajanga ataloker. Iba amala ken o nung aibelena alirtem nem yimya agi temerenshi tesashi agütsür.

Election tasembuba nung national unity sorkar nung tembang, kong Netanyahu-i iba apang opposition leader inyaka alisang Benny Gantz den sorkar tashi lemsateptsü molungtep. Saka iba sentong ya meinyakteti December ita lao aser election pezübuba agitsüsa akum.

Menden 120 aliba parliament indang iba election nung Likud ya party tulutiba liasü, saka Netanyahu-i teloktep sorkar ka metenzüktet aser party tulutiba jenjang tanabuba nung aliba nem sorkar tentettsü atema Lapid nem nungloktsü.

Netanyahu indang opposition tashi tuluka kumogo, aser itemji left aser centre rongnung kisüing masü, saka Yamina densema Likud den tangatetba kasashi aliba right-wing party ten densema lir.

Yamina ya menden tenet dang liaka parliament nung menden timba nguteta teloktep sorkar ka tentettsü atema par telok ya kanga tongtipang liasü. Hopta aika jembishinüa aruba

sülen party aika alidaki Lapid-i Yamina anir arutet, aser parnok ajak nukjidongji Netanyahu atsüingdoktsüba lir.

Sorkar tentettsü atema parliament nung menden 61 nüngdaka aliba ama telok ti tsüingta June 2 nü tezüngzüktep yangluteta liasü.

Ajisüaka tereprangtsü nungbo Bennett'er sorkar ya Israel indang küm 73 puti otsü nung yimsü süa arurtem memesüktsü amai lir. Iba alliance nungya tangatetba balala aliba party tem lir, kong Arab party temeja ka tang mezüngbuba densema lir. Iba sorkar nungya ostü tasen yanglua tetsür minister ti alitsü imlar.

Arab party Raam aser left-wing non-Arab Israeli party tem densema ajanga Palestine asoshi Israel sentong nung mangatetep adoktsü akok, kechiaser tatishitsü agi Yamina aser ano right-wing party, New Hope ya Israel nungeri amokbanga aliba West Bank

nung Yihuda nungi arua lidaktsütsü busema nokdaker.

Social policy nunga timtem ajurutsü akok, kechiaser party kari tetsür o tetsür aser tebur o tebur kibong akumba densema gay rights agütsüner, saka Islamist party Raam-i iba ya anema nokdaker.

Iba den bendenloksema national-religious party, Yamina taginüba dang nungi tali party kari tamangba yimsü tenokdangbatem salaner.

Bennett-i ashiba agi, par sorkari rongsenketsüing mesüra coronavirus tashidak wara indang tebilemstü nungi temolung agütsütsü aser ashishitep aketba ken o nung mokongshitsü.

"Nisung shingai pei tangatetba aser nukjidong mamadoktsü, saka mangdang kar asangsang akumtsü asoshi mapang atsülangtsüla. Onoki takok mongutetba ken o nung atsütepa makazüi takok ngutettsü mapa nung ranglok," ta pai tawa shia liasü.

Sonu Sood-i UPSC exam agütsütsü alir kaketshirtem yaritsü



New Delhi, Aami/June 13, 2021 (Agencies): India nung Covid-19 wara tensa tamajungdang, Bollywood actor Sonu Sood-i mapang shia timtemer tem lenmang balala ajanga yariba osang ajanga angazüker. Senzüsenbongtsü tenokdangba ajanga pei pei talidaki moteti tesem balala nung anendaka alirtem tayimtsü nung pei talidak tashi tongja, nüngdakbapur atema yipden aser oxygen anepaluba den teyari meshir ajak pai teka sala mulungsoa yaria arudar.

Star, Sonu Sood-i meimchir asoshi maneni mapa tajung inyakba mapang ka nung, pai New Delhi nung amenoka aliba youth organization - DIYA Delhi den longjemer mapatong ka tenzütsüo.

IAS exam agütsütsü jangrartem atema coaching scholarships agütsütsü nükjidong nung iba mapatong tenzütsü.

"IAS atema renemtsü tebilemba lir asüng. Nenok asoshi ni khuret abentsü.

'SAMBHAVAM' sangoktsütsü maongka anguba asoshi pelar. Iba ya @SoodFoundation & @diyanewdelhi longjemer tenzütsü mapatong ka lir," ta Instagram sabang ajanga Sonu-i lemsatop.

Taoba küm, India nung Covid-19 wara adoker külen nungi, nüngdakba purtem aser timtemer yaritsü asoshi actor Sonu Sood-i kanga dang bendanga agütsü nungita aruogo aser pai iba meimchir dang temeim sayuba ajanga pa nem 'messiah' nüngja agütsü lir. Tangalen nungi arur ayangertem pei pei talidaki yoktsü asoshi pai gari aser bus tem anepalutsü. Ibaji dang masü, lockdown ajanga mapa mengui alirtem tasüsa pai yariogo. Shisaliok wadang tsütsü, maongka tajung menguteti alir, sensaker kibongtem aser sempet tajung alir tanur aika pai mulungsoa yari züngdaksüdar.

Item dak alaka, Covid-19 agi shirangertem anepalutsü asoshi pai senotsü teyari agütsüo. Iba

wara ajanga tsürabur/kinunger süadoker alir tanurtem nem anagati education agütsütsü asoshi Sonu-i central aser state Sorkar dang mepishia liasü.

Tang, Sonu-i ano mapa tajung ka inyaktsü asoshi telemtetba tulu agiogo. Iba mapatong kübok, Civil service nung adentsü jangrartem, shirnok maongka tajung menguteti aser senotsü peria maliba ajanga timtemdar, parnok atema pai coaching scholarships agütsütsü asoshi tentet ka den teka amtepogo.

Hokolbarnü, Twitter sabang ajanga, UPSC examination atema renema alir kaketshirtem nem anagati coaching scholarships agütsütsü pai osang sangoktsü. Iba osang den külemi, pai Sambhavam den Divine India Youth Association, New Delhi longjemer iba maparen tenzütsü ta lemsatopa liasü.

Iba scholarship agizüktsü atema, tejangrartemi Sonu's foundation - www.soodcharityfoundation.org indang official website ajanga apply asütsüla. Application agütsütsü atema June 30, 2021 tashi lapoktsütsü, ta kasa sangdong nung shia lir.

Sonu maparen angashia nüburtemi pa dang pelaba den pa nem tenüngsang agütsüo.

Taoba mapang, Sonu indang fans temi Padma Vibhushan' atema pa tenüng agütsü. Fans dak alaka, Telugu actor, Brahmaji-ia Sonu nem tenüngsang agütsüba den külemi iba award atema Sorkar dangi pa tenüng yoka lir.

Ajay Devgn-i vaccination camp ka ayongzük



Mumbai, Aami/June 13, 2021 (Agencies): Bollywood actor aser film yanglur, Ajay Devgn-i pa meyong NY Foundation ajanga Hokolbarnü, Mumbai nung vaccination camp ka ayonga agiogo. Entertainment industry aser media nung inyakertem atema Ajay-i iba vaccination camp ayongzükka liasü.

Indian film critic aser trade analyst Taran Adarsh-i Twitter sabang nung iba vaccination camp indang osang jangjatsü.

"AJAY DEVGN-I VACCINATION CAMP ka ayongzük... Hokolbarnü (11.06.2021) #Mumbai nung #AjayDevgn indang NY Foundation-i iba vaccination camp ayongzükka liasü. Iba camp nung entertainment

industry aser media nung inyakertem densema külem inyakertem nem vaccine agütsüo," ta Taran-i lemsatop.

Mumbai nung Covid-19 agi kongshir alirtem atema ICUs aser emergency medical facility agütsütsü atema, taküm April ita, Devgn-i BMC aser Hinduja Hospital den teka amtep. Tesuiba anogo ishika tejakdang, film yanglur Rajkumar Hirani, Karan Johar, aser producer Mahaveer Jain nungeri taa magi entertainment industry nung inyakertem nem vaccine agütsütsü asoshi vaccination drive tenzütsü sentong yangluogo.

Osang ajanga angazükba agi, Yash Raj Films (YRF) studios ajanga film industry nung

inyakertem atema COVID vaccination drive tenzütsü liasü. Iba drive kübok mezüng shilem nung nisung 4000 nem vaccine agütsütsü sentong lir. Iba drive kübok YRF-i FWICE (Federation of Western India Cine Employees) nung register ser alir workers 30,000 nem vaccine agütsütsü asalentong yangludat.

Taoba drive sentong ka nung company-i mapa inyakertem nem vaccine agütsüo, koba Mumbai nung iba vaccination drive agia liasü. YRF Studios dak alaka, producer Sajid Nadiadwala-ia pa indang company Nadiadwala Grandson Entertainment nung külemi inyaker nübü 500 dak tema aser parnok kibong tem atema vaccination drive ayongzüktsüo.

Maneni, taoba hopta, Producers Guild of India (PGI)-ia parnok company nung inyaker züngsem aser associated production crew atema vaccination drive tenzütsüo. Indian Motion Picture Producers' Association (IMPPA) aser Screenwriters Association (SWA) naprongla longjemer parnok staff züngsem tem atema free vaccination drive tenzütsütsü osang sangoktsüo.

MENUNGRA BILEMTETER

Aso : 1912 - Asü : 14.06.1996

Asür Mayangsangla Chungtia

Ajemalu aser temeim Ojala

küm 25 tejaklen onok nü

akhüm nung liasü, ano tanü

onok nü temoatsü nung alir,

onoki nü nem tetushi

agütsür.

Kenü Kibuba anogo nung

onoki nü temeim tejak

angutsü.

Temeim

Chirnur aser Semchirtem



Minissha-i la meyong app ka lapokogo



New Delhi, Aami/June 13, 2021

(Agencies): Chat aser video call tem ajanga indang indanga fans den jembitsü nükjidong nung actress Minissha Lamba-i la meyong app tasen ka lapoktsüo.

"Minissha official app" ta nüngja agütsüba app ajanga fans temi indang indanga actress Lamba den jembitetsü, koba social media application sabang nung teti dangbo iba amala inyakim makoker.

Minissha lanuwa asüdang nungi lai sapuba star tem den jembina liasü, saka iba mapang itemji inyaktsü mekottet.

"Social media sabang nung comments mesüra messages tali akümba ajanga fans aser follower temi yokba message timbaka matongba osang angazükogo. Ibaji ajanga ni kü indang app balaka yanglutsü mulungtet. Iba app nung video chats mesüra normal chat ajanga fans den indang indanga connect asütsü

imlar aser iba app ajanga itemji inyaktsü kü nem tashi agütsür. Iba app ya live aser lapoka dang lir," ta lai ashi.

Minissha, shibai 2017 küm sayaba film "Bhoomi" nung tesüsa shilem agiba nguogo, lai tanga ama Covid-19 tensa tamajungdang fans dang iba wara nungi kümzükka alitsü asoshi mepishiogo.

"Tang ama tensa tamajungdang, iba wara nungi kümzükka alitsü asoshi ni sarasadentsür aser kati ka asoshi bilemstsütsü kü tayongzükba lir. Iba wara ajanga ajak timtemdaksür, saka akok tashi temzüng nung anidaktsü merangdi," ta lai ashi.

Taküm küm tetenzüklen, "Hello Zindagi" ta nüngja agütsüba jilushi ka nung Minissha-i shilem agiogo. Iba play ya actress Smita Bansal-i zülutsü aser March ita New Delhi nung sayua liasü.

Minissha kibong kümer küm pungo ajungba sülen, taoba küm, la kinungbo Ryan Tham den balaba osang sangoktsü. 2013 küm Minissha-i Ryan den kibong aküm aser iba osang meimbanga dang aru. Tang, Minissha-i la kinungbo den balaba osang temai adokdakja tena tsüngda tesendaktep mekongka akümba lemsatopa liasü.

'Knives Out 2' nung Madelyn Cline denogo



New York, Aami/June 13, 2021

(Agencies): 'Knives Out' den tatongtep film indang cast rongnung Madelyn Cline denogo.

Iba murder mystery sequel nung, arishi küm 23 tain actress Madelyn-i Daniel Craig den külemi shilem agiba angutsü, koba Netflix ajanga yangludat.

Knives Out 2 nung, Daniel dak alaka, Madelyn-i star talisa Dave Bautista, Kate Hudson, Leslie Odom Jr., Janelle Monae, Kathryn Hahn aser Edward Norton nunger den külemi shilem agiba angutsü.

Iba sequel nung Daniel Craig-i tanaben detective Benoit Blanc ama shilem agitsü. 2019 küm sayaba Knives Out film takok anguba sülen, Rian Johnson-i tanabuba shilem zülua aser direct asütsü terenemba lir.

Taküm tsüklawa mongpu mapang, iba project dak sendakba Production maparen Greece nung tenzütsü sentong lir, saka Daniel indang role dak alaka, film otsü tarensen memetetdaksü.

Iba film dak alaka, Madelyn-isa Netflix TV series 'Outer Banks' nunga shilem agitsü sentong lir.

Tawa, Leslie-i, 'Knives Out 2' ya yimya balaka nung yanglutsü Rian tebilemba lir aser tanabuba film ya mezüng dang nungi tajungba asütsü imlar, ta lemsatop.



Baku, Azerbaijan kübok Baku Olympic Stadium nung Wales aser Switzerland na asaya tembangba sülen Switzerland nungi asayartemi fans tem nem teka maloka tenungsang agütsüba noksa nung angur. Iba asaya 1-1 agi draw süa tempanga liasü.

Christian Eriksen-i par teammate tem den salem lemsatep

Aami/June 13, 2021 (Agencies): Christian Eriksen Copenhagen hospital nung temang anepaludar aser pa temang tang tajungba lir. Pai par teammate tem den salem lemsatepogo, ta Danish soccer federation-i ashi. Honibarnü European Championship asaya ka nung pa süjia aoba sülen tang temang anepaludar.

Finland den Honibarnü Copenhagen nung asayaba mapang tatalokba agizüktetsü merangtepba mapang Danish team nung tanungba asayartem nem crisis management assistance agütsüogo. Asaya mezüngbuba shilem tatemi Eriksen tejak tamaser ali nung remdaka lao aser medical staff temi CPR agütsütsüsa aküm.

"Onoki tanep Christian Eriksen den jembio, aser pai par teammate tem den salem lemsatepogo," ta Danish federation-i tweet asü. "Pa temang tajungba lir aser maneni temang asadangtsü asoshi mozükidang mungdar. National team aser staff tem nem crisis assistance agütsüogo aser yashi

tatalokba sülen maneni kati ka nongita yaritepsü."

Eriksen süjia aoba sülen Finland aser Denmark na tsüngda asaya minute 90 shi anena ata. Iba sülen asaya tenzükshi, koba Finland-i goal 1-0 agi koka liasü.

Danish team-i Deobarnü parnok anenzüka aliba tesem nung media dak sendakba sentong balala renemer aliba ajak thitsüogo aser training session-a thinenogo.

Arishi küm 29 tain Eriksen tang Rigshospitalet nung temang anepaludar. Iba mozüki ya Denmark nung mozüki tajungtiba rongnung ka lir aser mozüki ya Parken Stadium nungi mile ka majung dang orr lir.

Kasa mapang nung Inter Milan nungi asayasang nongita yariba atema Danish federation-i, fan aser tanga team tem dang kanga pelaba lemsatepogo.

Honibarnü asaya tembangba sülen Denmark coach Kasper Hjulmand-i, Denmark team nung asayartem ajak nem nüngdakba

teyari ajak agütsütsü ta shiogo, kechiyong anunga aliba asayatem nung rangloker asayatsüji kanga tongtibang lir.

Denmark nung tang mezüngbuba tongtibang asayamung ka ayongzüka asayaba mapang iba tatalokba ajanga Copenhagen anakshitsüogo.

Kasa mapang nung Belgium nung asayar Romelu Lukaku aser South Korea nung asayar Son Heung-min nati tenati idaktsüba goal Eriksen nem dedicate sütsüogo. Honibarnü Russia den asayaba mapang Belgium atema mezüngbuba goal idaktsüba sülen Lukaku-i camera yua alileni asema orr "Chris, Chris ni na meimer," ta shia liasü. Tena Inter Milan nung külemi asayar.

Maneni Son-ia, Asia World Cup qualifier nung Lebanon goal 2-1 agi akokba asaya nung goal ka idaktsüba taoba mapang Tottenham Hotspur nung külemi asaya alisang Christian Eriksen nem iba goal dedicate süja liasü.

Sanchez Copa America group stage nung masayatetsü

Aami/June 13, 2021 (Ageicnis): Chile nung forward Alexis Sanchez tetsüng yiruba ajanga Copa America group stage nung masayatetsü, ta national team sangdong ka ajanga Honibarnü metetdaksüogo.

Hokolbarnü training agiba sülen arishi küm 32 tain asayar

tetsü nung timtem aliba ngutetogo aser pa asayamung nung shilem agitsü atema Chile team tem külemi Brazil-i maotsü.

"Pa Copa America asayamung tetenzüklenbo masayatetsü aser iba yongji asayar ya Chile nung dang national team medical teami temang anepalua atatsü," ta

team sangdong ajanga metetdaksü.

Chile team Copa America asayamung nung Hombarnü Rio de Janeiro kübok Nilton Santos stadium nung Argentina den asayaa tenzüksü. Parnok Group B nung Bolivia, Paraguay aser Uruguay den asayatsü ataa lir.



Winners 2021

Esgbaston, Birmingham nung England den tanabuba cricket test asaya akokba sülen New Zealand team nungi asayartem pelatepba noksa nung angur.

French Open; Krejckova & Siniakova nati tarep asaya kokogo

Aami/June 13, 2021 (Agencies): Czech tsür Barbora Krejckova-i French Open tetsür kija asaya akokba sülen Deobarnü tarep asaya nunga Katerina Siniakova den takok nguogo. Final asaya nung tenati Iga Swiatek aser Bethanie Mattek-Sands na 6-4 6-2 agi koka liasü.

2000 küm France tsür Mary Pierce sülen Krejckova-i tang mezüngbuba French Open tetsür kija aser tarep asaya anaprongla koktetogo.

Arishi küm 25 tain Krejckova-i Honibarnü mezüngbuba Grand Slam kija asaya ka akokba sülen la jenjang 15bubai atutsü aser Hombarnü ranking sayaba mapang la tarep asaya nung temaba jenjangi atutsü.


Czech tsür tarep yagi 2018 küm Roland Garros-a koker lir aser Deobarnü final asaya nung tena 5-1 agi tejakdang ser asaya tenzük aser Swiatek o Mattek-Sands nati kanga junga asayateta 5-4 kümaka tenati Krejckova indang service game menokdakteti liasü.

Final asaya nung Siniakova-i maneni service junga moteti asaya aser tenati asaya nung double faults ti mena.

Ajisüaka service aoba nung timtem aliba kokteter tena kati ka den kanga junga angatettepa asayar asaya akok

Tanabuba set nung Krejckova aser Siniakova nati tena indang service game ka break südaktsü saka tenati meyiper serve asemen tashi break süa asaya akok.

Portugal nungi sayar Joao Cancelo dak Covid-19 potet



Aami/June 13, 2021 (Agencies): Portugal nungi asayar Joao Cancelo dak Covid-19 tashidak potetogo aser pa Euro 2020 nung shilem magitettsü, ta team sangdong ka ajanga Deobarnü metetdaksü.

Manchester City indang right-back melena Manchester United nungi asayar Diogo Dalot shiba AC Milan-i loan nung oa lir, pa Portugal team nung züngoksemogo. Portugal team Group F nung mezüngbuba asaya Mongolbarnü Hungary den Budapest nung asayatsü.

Hungary team den mezüngbuba asaya asayatsü ghonda 48 dang lia Cancelo team nungi masayatetsüsa akümba ya coach Fernando Santos atema tetsükdaktsü tulu ka kümogo.

Mezüngbuba asaya sülen parnok anogo pezü lir Munich nung Germany den asayatsü aser June 23 nü Budapest nung world champions France den asayatsü lemsüka lir.

Honibarnü tashidak tendangba osang angazükba sülen Cancelo, lokti nungi pilar temang anepaludar.

"UEFA-i Covid-19 dak sendakba nung tetuyuba agütsür aliba dak ajemdaker squad nung asayartem ajak Honibarnü RT-PCR tests agi. Joao Cancelo dak alaka asayar ka dak danga tashidak mepotet," ta Portuguese federation-i metetdaksü.

Euro nung asayar tashidak menartem rongnung tesüsa Cancelo dak tashidak potetogo.

Russia team nungai winger Andrei Mostovoy dak Hokolbarnü tshidak potetogo aser pa European Championship nung shilem magitettsü.

Kasa mapang nung Spain captain Sergio Busquets-a tashidak poteter tang lokti nungi pilaa temang anepaludar aser pa Hombarnü Sweden den Seville nung asayatsü aliba mezüngbuba asaya nung shilem magitettsü. Portugal den warm-up asaya ka nung shilem agiba sülen pa dak taoba hopta tashidak poteta liasü.

Juventus nungi asayar Sweden nung forward Dejan Kulusevski aser midfielder Mattias Svanberg na daka tashidak potetogo.

BILEMDANGANG

"Prangshiba oset ajakjibo hon masü."